

Entrevista cu Gino Vrolijk, autor di storia pa mucha "Na caminda pa e fiesta grandi"



ORANJESTAD (AAN)

— Señor Gino Vrolijk su profesion ta maestro di school, y actualmente e ta fungi como director di Fontein Kleuterschool na San Nicolas. Matutino DIARIO a entrevista señor Vrolijk relaciona cu e storia pa mucha cu el a skirbi pa e di 21 Festival di Buki di Biblioteca Nacional, titula: "Na caminda pa e fiesta grandi". Manera ta conoci esaki ta un buki cu a wordo duna como regalo den tur libreria cu a participa den e festival di buki, na tur persona cu a cumpra un buki di un di e autornan participante.

Na e pregunta: "Cual fiesta grandi?" E autor a contesta: "Si. Muchanan tambe a puntra cual ta e fiesta. E ta e fiesta di wega y deporte conecta na e tema di e Siman di Buki. Ora mi a tene e storia y esaki ta encera ora e mucha ta bay hunga cu diferente wega, cos di hunga y diferente deporte. Den e storia e wega y articulan di hunga ta haya bida".

Den tur storia tin protagonista, y den e cuenta aki e ta algo unico y diferente.

"E storia ta trata di un gran cantidad di cos di hunga y di deporte cu nan ta transportando pa e fiesta grandi pa e muchanan hunga cu nan, pero na caminda e caha ta hanco habri y algun di nan ta cay for di e caha y e truck ta sigui core. Eynan e aventura ta cuminsa con nan ta yega na e fiesta. E protagonista principal ta e skateboard, pasobra e ta haya e solucion pa e cosnan di hunga yega na e fiesta", sr. Vrolijk ta conta.

E storia aki ta dirigi na muchanan di tres pa ocho aña y e ta keda teni na nan mundo, sr. Vrolijk a agrega.

Esaki ta e di dos buki skirbi pa meneer Gino Vrolijk. Esun prome ta: "Sumpi, e wanglo sabi" y su intencion ta pa den futuro e lo skirbi mas storia pa nos muchanan.

Cuanto tempo meneer Vrolijk a tarda pa keda cla cu e buki?

"E storia so a tuma di un pa dos

luna pa e wordo concretiza. Mi a cuminsa cu e idea, cu mester wordo drecha, haya reaccion di otro personanan, ademas di un corector y un editor pa pasa door di dje.

Kiermen el a tuma como tres luna di intercambio riba e texto, y banda di esey ta bin e parti di produccion, ilustracion, diseño grafico y imprenta".

Financiaunbukiribarecursonan propio ta sumamente costoso?

"Si hacie riba bo mes ta hopi caro, pero den e caso aki el a wordo cubri completamente pa sponsornan, y danki na esey e buki por a wordo ofreci como regalo den e campaña pa fomenta cumpramento di buki y lesamento bao di nos muchanan".

E campaña aki no a stop ainda, tanten cu tin bukinan na stock.

Con e acogida pa e buki aki tabata?

"E acogida tabata hopi bon. Bishitando varios school mi a haya e respuesta di tanto e muchanan cu a biba e storia como e maestranan cu ta contento cu mi a bin cu un buki pa muchanan den e edadnan menciona, y cu un tema cu ta den e mundo di e mucha manera cos di hunga y deporte. Tambe e mayornan a haya no solamente e storia pero e ilustracion tambe, hopi bon", meneer Vrolijk a subraya.

Pero con meneer Vrolijk mes, a haya e festival di buki e aña aki?

"Eigenlijk tur aña e Festival di Buki ta hopi bon. Mi ta haya cu ta hopi importante pa mantene e Festival di Buki pa motibo cu e ta stimula e muchanan pa lesa y e mayornan tambe, pa nan motiva nan yiunan pasobra nan ta e promenan na stimula lesamento y mi ta haya cu un siman di estimulo pa lesa buki ta hopi, hopi bon mes. Tambe nos ta intercambia cu otro autornan y esey ta masha importante. Nos ta intercambia idea y e produccionnan cu nos tin, etc".

Con meneer Vrolijk ta mira na Aruba e cultura di lesa buki?

"Ta hopi papia cu na Aruba no tin un cultura di lesamento y esey por ta pa diferente motibo.

Un di e aspectonan cu mi kier sigui cune ta produci buki na Idioma Papiamentu, mirando cu e ta e idioma materno di nos muchanan, pa logra tin un cantidad mas amplio di buki den interes di nos muchanan, pa nan por lesa. Esaki ta e parti cu lo mi kier contribui na dje".

Pakico ta asina importante pa e futuro di e mucha, pa e tin gusto pa lesa buki?

"E ta hopi importante pasobra no tin ni un profesion cu no mester di lesamento. Tur profesion, di esun di mas grandi te esun di mas chikito, bo mester por lesa. Un persona cu tin cu traha cu un machine e mester por lesa e indicacionnan, con pa sigui e procedure, etc. Lesamento ta sumamente importante den e bida di un mucha, pa ora e bay school pero tambe pa sigui studia pa un carera y yega na su profesion. Lesamento ta un mester".

E estudiante cu for di chikito ta lesa buki tin mas chens di ta exitoso den su estudio?

Riba nos pregunta final aki, meneer Vrolijk a contesta positivamente. "Sigur cu si. Pasobra diferente materia, por ehemplo matematica, tin di haber cu un parti importante di lesa pa por yega na un solucion. Kiermen lesamento

no ta solamente literatura pero e ta integra den tur materia y importancia di lesa ta hopi grandi na school y tambe pa conocimiento general, pa hiba mehor combersacion, ademas cu banda di lesa bo ta siña hopi cos", sr. Vrolijk a indica.

El a agrega cu semper e ta conseha mayornan pa busca buki na interes di e mucha. Kiermen si e gusta avion, auto, of otro tema busca buki cu ta papia riba esaki pa e cuminsa cu lesamento.

Internet por kita e mucha su interes pa lesa buki?

"Na momento cu e mucha ta busca informacion riba internet, ya caba e interes tey pa busca algo y e buskeda aki ta crea e interes pa lesa. Y tambe hopi buki a bira awor digital. Kiermen bo tin e bukinan di papel y esnan digital, pues den esaki tambe mundo ta cambiando" meneer Vrolijk a subraya.

Meneer Vrolijk ta conseha mayornan pa stimula nan yiunan pa lesa?

"Si. Un conseho cu semper mi tin pa mayornan ta pa stimula nan yiunan pa lesa pasobra lesamento ta cuminsa na cas.

Mescos cu mi mama y mi wela cu ta esnan cu tabata conta mi storia tur anochi, y asina mi a bin den contacto cu buki y mi smak pa lesamento a crece mi ta desea pa nan haci. Mayornan tin un rol hopi importante den lesamento bao di nan yiunan", e autor sr. Gino Vrolijk a conclui.